



१ पत्रुस

ब्रेक्ब मुर: एको चिठी येसु आ शेंसीब पत्रुसमी इस्राएली मदुम्शो मुर आन कली ब्रेक्शो बाक्त।

गेना ब्रेक्शो: एको चिठी ६४ ए. डी. नोले ब्रेक्शो बाक्त। मेना रोम सहर डा मुरपुकीमी थमा सुइक्ब आन कली शुश खेदा पा, साइक्चा गोव्रमे बाक्त। रोम सहर कली यो बेबीलोन यो देंनीम। १पत्रुस ५:१३

मार ब्रेक्शो: पत्रुसमी थमा सुइक्ब आन कली “बोल्यो दुमीन। थमा सुइक्बपुकीमी श्येत जचा माल्नीम” दे ब्रेक्शो बाक्त।

डोंइती डा लोव्र

१ गो येसु ख्रीस्त आ सोइश्शो पत्रुस नड। एको चिठी पोन्टस, गलातीया, कापाडोसीया, एसीया नु बिथीनीया रागीम ब्रशा बाक्शो इस्राएल रागी डा थमा सुइक्ब, इन कली ब्रेक्ताक्न्नी। हिब्रू १३:१४ २इं आफ परमप्रभु यावेमी इन कली योव्रशा, आ मुर दुम्नीम देंत। मिनु आ सोक्तीमी इन कली येसु ख्रीस्त कली टीब सेल्लु। आ

हुशेमी चोव्रखो सेल्लु। परमप्रभु यावे आ गेशो शिशी नु थुं नाइक्तीके डोंइती क्येडा मुल गे नु शुश बाक्ल। रोमी ८:२६

ब्रोंइचा आ पर्बम शेंशो

३इं प्रभु येसु ख्रीस्त आ आफ नेल्ल आसीक पाइश्शो बाक्ब, दे गो मान पय। मेको आ शुश शिशी पतीके नु येसु ख्रीस्त बेक्शो रे सेंसीशोमी इं कली ब्रोंइशा बाक्तीक आस गेशा, नक जरमेशो मुर सेल्लु। कलस्सी १:५ ४मिनु इं कली स्वर्गमी

जाम्शा मलाइब, काइ मबिग्रेब नु गेना हना यो लीब शोंप वोइशो बाक्ब। कलस्सी १:१२ ५ परमप्रभु यावे आ सक्तिमी इं कली कोव्रब। गो पाप रे ब्रोंइशो मु्र बाक्नय, दे थमा सुइक्नय। मेको नेल्ल नोले डा नाक्तीमी कोइब। यूहन्ना १०:२८ ६गे मेको तुइशशा, ग्येरनीनी। मुल इच्का नाक्त सम्म थुं थाम्चा कली मार मार श्येत जाइनीनी। १ पत्रुस ५:१०; २कोरिन्थी ४:१७ ७मारदे श्येत जाइनीनी देशा हना, इन थमा सुइशो थमा कों, जोल कों, दे नाक्चा कली श्येत जाइनीनी। मोपा श्येत जाइतीनी हना, इन थमा सुइक्तीके मीम याप्पाइशो सुन क्येडा शुश क्येट लाइब दुम्ब। मिनु येसु ख्रीस्त आ यिची ना ठेयब सेल्टीक, छेडछेड नु मान पतीक दुम्ब। हितोपदेस १७:३, यसेया ४८:१० ८गे मेको कली मताइतीनी हना यो, दाक्नीनी। मेको कली मुल सम्म मतथु यो, थमा सुइक्तीनी। गे गिश ग्येरना ग्येरन बाक्शो बाक्नीनी, देने मचाप्नीनी। यूहन्ना २०:२६; २कोरिन्थी ५:७ ९इन थमा सुइक्तीकेमी पाप रे ब्रोंइचा ताइनीनी।

१०साइ डोंइती परमप्रभु यावे आ लोव्र पाइबपुकीमी गे शिशी ताइब दुम्नीनी, दे लोव्र पशो बाक्तेक्म। मिनु पाप रे ब्रोंइतीके तुइक्चा कली शुश माल्शो बाक्तेक्म। लूका १०:२४ ११मेकोपुकीमी आन आगामी बाक्शो ख्रीस्त आ सोक्त कली “पाप रे प्रोंइब सु बाक्मे, गेना जाक्बा?” दे हिल्लो पामे बाक्त। मोदेशो पा माल्ना माल्न ख्रीस्त आ श्येत जचा नु छेडछेडम लचा आ पर्वमी नोले दुम्ब लोव्र पामे बाक्त। भजन संग्रह २२:-, यसेया ५२:१३-५३:१२ १२मेकोपुकीमी आन पाला डा मु्र आन कली ला लोव्र मपामे।

नोले डा मु्र, इन कली यो लोव्र पा शेंदमे बाक्त। इन कली दोपा शेंदमे बाक्त देशा हना, परमप्रभु यावेमी आ सोक्त स्वर्ग रे सोइशो बाक्त। मेको आ पतीकेमी शेंबपुकीमी इन कली ग्येरपाइक्ब लोव्र शेंताक्म। परमप्रभु यावे आ स्वर्ग डा गेय पाइबपुकीम यो मेको तचा तुइक्चा दाक्नीम। एफिसी ३:१०

परमप्रभु आ मु्र दुम्शो

१३मोपतीके इन थुं फ्रेंदीन। गेय पचा डोंइती मिम्तीन। येसु ख्रीस्त जाक्मेनु, इन कली शिशी पाइब, दे आस पा बाक्कीन। लूका १२:३५-३६ १४मुल टीब आल खोदेशो पा इन डोंइती मतुइक्थु पशो मरिम्शो पचा क्येडा डोन बाक्कीन। रोमी १२:२ १५इन कली ब्रेप्ब, येसु ख्रीस्त दोदेशो बाक्मे, गे यो मोदेशो दुम्शा बाक्कीन। १६परमप्रभु यावे आ ब्रेक्पाइशो लोव्रमी “गेपुकी आं कली ला ठेयब सेलीन। मारदे हना गो का ला इन परमप्रभु नड” दे ब्रेक्शो बाक्ब। लेवी १६:२

१७गेपुकीमी परमप्रभु यावे कली “इं आफ” दे पुंइना पुंइन बाक्नीनी। मेकोमी मु्र आन कुल मकोव्रथु, आन पशो कोव्रशा, निसाफ पाइब। मोपतीके गे रागीमी बाक्नीनु, पाप पचा हिनीन। रोमी २:११; फिलिप्पी २:१२ १८इन किकी पिपी रे “गो नरक लाइब बाक्नीकी” दे तुइक्नीनी। मुल गे नरक लतीक लां रे प्रोंइचा पुंइसीशो बाक्तीनी। दोपा प्रोंइचा पुंइसीशो बाक्तीनी देशा हना, जाम्शा लाइब सुन नु चांदी थाप्शा ममाइ, १कोरिन्थी ६:२०; १कोरिन्थी ७:२३; १पत्रुस ४:३ १९येसु ख्रीस्तमी मारेइ मदुम्शो पाठा बुद पा आंम हुश शाइक्पाइशशा इन

कली नरक रे प्रोइतु। *हिब्रू ६:१४; यसेया ५३:७; यूहन्ना १:२६*

२० परमप्रभु यावेमी रागी सेल्चा क्येडा डोंइती “येसु ख्रीस्त पाप रे प्रोइब दुम्ब” दे मिम्शो बाक्माक्त। मेको रागी नुप्ची ना इन पर्वम तुइक्पाइश्शो बाक्त।

रोमी १६:२५-२६ २१ गे येसु ख्रीस्त आ पतीके परमप्रभु यावे कली थमा सुइक्नीनी। मेकोमी येसु ख्रीस्त कली बेक्शो रे सेंपाइश्शा, छेडछेडम वोइक्तु। मोपतीके गे “परमप्रभु यावेमी इं कली कोत्रब” दे थमा सुइश्शा आस पने। २२ दोपा येसु ख्रीस्त आ देशो टिशा, थमा गेय पा पाप रे डोन बाक्नी, मोपा गे लोकब आन कली यो थमा पा दाक्नीनी। गे थमा सुइक्बपुकी इन थुं नेल्लेमी थमा पा दाक्मुने। २३ गे नक जर्मेशो खोदेशो बाक्नीनी। जाम्शा लाइब ममाइ। गेनायो मजाम्ब दुम्तीनी। मेकोन ब्रोंइचा गेब नु गेना हना यो लीब परमप्रभु यावे आ लोत्र बाक्ब। *यूहन्ना १:१३; याकूब १:१-१८*

२४ परमप्रभु यावे आ देशो लोत्र मार बाक्त देशा हना, रागी डा मुर नेल्ल घांस खोदेशो बाक्नीम। मेको आन दारस बोइश्शो फू खोदेशो बाक्ब। आ घांस सोत्रब, मिनु फू यो हेम्ब। *याकूब १:१०-११*

२५ तन्न परमप्रभु यावे आ देशो लोत्र गेना हना यो लीब। मेको आ ग्येरपाइक्ब लोत्र बाक्ब। मिनु शेंबपुकीमी मेको इन कली शेंताक्मे। *यसेया ४०:६-८*

परमप्रभु आ योत्रशो मुर

२ मोपतीके गे नेल्ल मरिम्शो पचा, मुर आन कली मरिम्शो लोत्र पतीक नु गाइक्तीके ताइक्तीन। मिनु जोल पतीके, गेहे पतीके नु मुर आन लोत्र

कुरशा गाक्चा नेल्ल ताइक्तीन। *याकूब १:२*
२नक थिशो आलम दूध तूचा माल्शो खोदेशो पा, गे यो परमप्रभु यावे आ लोत्र तुइक्चा मलीन। गे मोदेशो पाइतीनी हना, इन पाप रे ब्रोंइशो थुं बारना बारन लाइब। *हिब्रू ५:१२-१३; मती १८:३* ३मारदे हना गेमी परमप्रभु रिम्शो पाइब बाक्ब, दे तुइक्नीनी। *भजन संग्रह ३४:१०*

४ येसु ख्रीस्त ब्रोंइचा गेब फुल्लु बाक्ब। मेको आ नेक्था लने। मुरपुकीमी मेको कली ममाल्शो फुल्लु खोदेशो पा ताइक्ताक्म। तन्न परमप्रभु यावेमी “मेको कली योत्रशो नु नेल्ल क्येडा दाक्शो बाक्ब” दे मिम्ब। *भजन संग्रह ११८:२२; यसेया ८:१४-१५; मती २१:४२* ५ मिनु गे यो ब्रोंइचा गेब फुल्लु खोदेशो बाक्नीनी। मोपतीके परमप्रभु यावे आ सोक्तीम सेल्शो खिं डा फुल्लु दुमीन। परमप्रभु यावे आ डोंइती राप्ब मुर दुमीन। आ सोक्त डा चढ़ेतीक गेय पा बाक्कीन। येसु ख्रीस्त आ पतीके परमप्रभु यावेमी इन पशो ताक्ब। *एफिसी २:२१-२२; हिब्रू ३:६; रोमी १२:१*

६ मारदे हना परमप्रभु यावे आ लोत्रमी मार ब्रेक्शो बाक्ब देशा हना “नेनीन, गो सियोन डांडामी फुल्लु का वोइक्नुड। मेको सुर डा फुल्लु दुम्शा, योत्रसीशा नु दाक्सीशा बाक्ब। सु सुमी मेको कली थमा सुदमे, मेको मुर मुने दोक्चा ममाल्नीम” दे ब्रेक्शो बाक्ब। *यसेया २८:१६*

७ मोपतीके थमा सुइक्बपुकीमी मेको कली दाक्नीम। तन्न थमा मसुइक्ब खिं सेल्बपुकीमी मेको फुल्लु कली ताइश्शो बाक्तेक्म। तन्न मेको सुर डा फुल्लु दुम्त। ८ मिनु लेंशा “मेको फुल्लुमी मुर आन कली दाइल पपाइक्ब। मेको ठेयब फुल्लुमी मुर आन कली थिप्पाइक्ब” दे

ब्रेकशो बाकब। मुरपुकीमी परमप्रभु यावे आ लोव्र मटितीके दाइल पांडसीनीम, दे डोंडती मेको आ पर्वम देशो बाकब।

भजन संग्रह ११८:२२; यसैया ८:१४; रोमी ६:३३; लूका २:३४

६तन्न गे परमप्रभु यावे आ योव्रशो मुर दुम्तीके, आ राज्य डा चढेब परमप्रभु यावे आ रागी डा मुर दुम्तीनी। मारदे मोदेशो दुम्तीनी देशा हना, परमप्रभु यावेमी इन कली रिम्शो पशा, छिडछिड रे गुंडशा, आंम आ छक लाकचा डा छेडछेडमी वोइशो बाकत। मिनु अरु नेल्ल आन कली शेंचा, दे मोदेशो दुम्तीनी। प्रस्थान १६:६; यसैया ४३:२१; प्रकाश १:६; व्यवस्था ४:२०; व्यवस्था ७:६; एफिसी ५:८ १०डोंडती गे परमप्रभु यावे आ मुर मबाकनी। मुल परमप्रभु यावे आ मुर दुम्तीनी। डोंडती गे परमप्रभु यावे आ शिशी मतशो बाकतीनी। तन्न मुल परमप्रभु यावे आ शिशी ताइब दुम्तीनी। होसे २:२५; रोमी ६:२४-२६

थमा सुइकब दोपा बाकचा माल्नीमी

११आं दाकशो लोकबपुकी, गो इन कली इन थुं बारपाइक्तीक लोव्र पाइनुड। गो रागीम बाकयानु, रागी डा पौना खोदेशो बाकनय। मोपतीके इन दला दाकस पा रागी डा मुर खोदेशो मपने। ग्रांरा दिचा डा गेय रे डोन बाककीन। मारदे हना मोदेशो गेय इन थमा सुइक्तीक थुं नु जीब। भजन संग्रह ३६:१३ १२थमा मसुइकब आन दातेमी रिम्शो पने। मेकोपुकीमी इन पर्वम “मरिम्शो पाइब बाकनीम” दे मरिम्शो लोव्र पांम्तेक्म हना यो, इन रिम्शो पतीक तशा, परमप्रभु यावे नु गुम्ची ना मेकोपुकीमी परमप्रभु यावे कली ठेयब सेल्मेक्ल। मती ५:१६

१३प्रभु आ पर्वम सरकारमी अधिकार गेशो मुर आन कली टिने। पिप नेल्ल क्येडा ठेयब बाकब। मोपतीके टिचा माल्नीनी। रोमी १३:१-७; तीतस ३:१ १४मिनु आ वोइशो ठेयब मुर आन कली यो टिचा माल्नीनी। मेकोपुकी मरिम्शो पाइब आन कली सजाइ गेचा नु रिम्शो पाइब आन कली “गे रिम्शो पाइतीनी” देंचा कली वोइशो बाकनीम। १५परमप्रभु यावे आ दाकशो मार बाकब देशा हना, इन रिम्शो पतीकेमी मतुइकब नु निप्स मपाइशो आन कली सिक्सी पपतीन। १पत्रुस ३:१६; तीतस २:८ १६पाप रे प्रोंइचा पुंडसीशो मुर दुम्शा बाककीन। “पाप रे ब्रोंइचा ताइनुड” दे मिम्शा मरिम्शो मपने। परमप्रभु यावे आ वाइलीम वाइल दुम्शा बाककीन। गलाती ५:१३; २पत्रुस २:१६ १७मुर नेल्ल आन कली मान पने। थमा सुइकब आन कली दाकतीने। परमप्रभु यावे कली मान पा हिनीन, पिप कली मान पने। रोमी १२:१०; हितोपदेस २४:२१

येसु आ श्येत जशो कोंडतीके

१८गे खिं डा गेय पाइबपुकी, इन होव्रप क्येडा हिंशा टिने। रिम्शो पाइब होव्रप कली ला ममाइ, मरिम्शो होव्रप कली यो टिचा माल्नीनी। एफिसी ६:५; तीतस २:६ १६इन होव्रपमी इन कली बित्चीम श्येत गेम्तेक्म हना यो, गे परमप्रभु यावे कली मिम्शा, श्येत फाल्शा बाककीन। मेको परमप्रभु यावे आ दाकशो बाकब। २०गे मरिम्शो पशा, तुप्या पुंडसीनीनु, मेको फाल्शा बाकतीनी हना, मार रिम्शो पनी डा? रिम्शो पशा यो, श्येत गेचा पुंडसीशा, फाल्शा बाकतीनी हना, परमप्रभु यावे आ दाकशो पाइनीनी। १पत्रुस ३:१४; मती ५:१० २१मोदेशो

पचा, दे योत्रशो ननी। ख्रीस्त यो इन पर्वम श्येत जशा, इन कली कोंडतीक दुम्त। मोपतीके गे आ खोदेशो पचा मालनीनी।
 १ पत्रुस ३:१८; मत्ती १६:२४ २२ मेकोमी काड पाप मपवो। जोल यो मपवो। यूहन्ना ८:४६; यसैया ५२:६ २३ मुरपुकीमी मेको कली शुक्शी लोत्र पाम्तेक्म हना यो, मेको आन कली लोत्र मलेत्त। मिनु श्येत जशा यो, मुर आन कली हिंच मकोंड। तन्न ठीक पा निसाफ पाइब कली जिम्मा गेंसाक्व। २४ मेको इं पाप क्याम्चा कली शीमी क्येप्शा कांटी थोकशा साइक्चा पुंडसाक्व। इं पाप पतीक थुं साइक्चा नु इं ठीक पतीक थुं प्रोंइचा, दे साइक्चा पुंडसाक्व। मोपा मेको आ कांटी थोकशो गारपुकीमी गे साशा ठीक दुम्तीनी। १ यूहन्ना ३:५; गलाती ३:१३; रोमी ६:८,११ २५ डोंइती गे हेथे गाक्ब भेडा खोदेशो बाक्तीनी। तन्न मुल इन गोठला नु इन थुं कोत्रब आ नेक्था लेशशा जाक्तीनी।
 यसैया ५३:६; यूहन्ना १०:१२

मीश वोंइश कली अरेतीक लोत्र

३ गे मीश मुरपुकी, आंम वोंइश आ देशो टिने। का निक्शी वोंइश मुरपुकी परमप्रभु यावे आ लोत्र मटीब बाक्तेक्म हना यो, आ मीश आ रिम्शो पशो तशा, लोत्र मपथु यो, थमा सुइक्ब दुम्नीम। एफिसी ५:२२; १ कोरिन्थी ७:१६ २ इन मान पशो नु इन पाप रे डोन बाक्शो तशा, मोदेशो पाइनीम। ३ रिम्शो पतीक मार बाक्ब देशा हना, जाम्शा लाइब नोस पचा, चांमी मार मार चुंडसीचा, सुन पांइचा नु शुश क्येट लाइब वा फेक्चा ममाड, यसैया ३:१८-२३; १ तिमोथी २:६ ४ मुर आन थुमी खुइशो जाम्शा मलाइब

पांइतीके बाक्ब। मेको मार बाक्ब देशा हना, ब्रेम्शो नु सिक्सी पा बाक्तीक थुं बाक्ब। मेको परमप्रभु यावे आ डोंइती शुश रिम्शो बाक्ब। ५ साड डोंइती पाप रे डोन बाक्शो मीश मुरपुकीम परमप्रभु यावे कली आस पा आंम वोंइश कली टिशो बाक्तेक्म। ६ सारामी अब्राहाम कली मान पा टिशो बाक्त। मिनु मुल गे यो ठीक गेय पशा, श्येत जचा महिंथु, मेको आ तमी खोदेशो दुम्तीनी। उत्पत्ती १८:१२

७ गे वोंइश मुरपुकी, आंम मीश नु रिम्शो पा बाक्कीने। मीश मुरपुकी वोंइश मुर खोदेशो पा बोल्यो मबाक्नीम, दे तुइक्नीनी। मेको मिम्शा, इन मीश कली मान पने। मारदे हना गे निम्फा परमप्रभु यावे आ शिशी ताइब बाक्नीसी। मो पाइतीनी हना, इन पुंडशो लोत्र परमप्रभु यावे आ डोंइती मतेक्सीब। १ कोरिन्थी ७:५; एफिसी ५:२५

थमा सुइक्ब आन कली अरेशो

८ मिनु नोले गे नेल्ल थुं का डा दुम्शा, मुर आन कली दाक्शा, इन लोक्ब नु दाक्मुने। ब्रेम्शो थुं पाइशो मुर दुमीन। ९ इन कली मरिम्शो पाइब आन कली मरिम्शो मपने। इन कली शुक्शी लोत्र पाइब आन कली शुक्शी लोत्र मपने, आसीक गेने। मारदे हना गे आसीक ताइब दुम्चा कली योत्रशो बाक्नीनी। १ थिस्सलोनिकी ५:१५ १० मिनु परमप्रभु यावे आ लोत्रमी “सु सु ब्रोंइचा नु रिम्शो बाक्चा दाक्नीमी, मेकोमी शुक्शी लोत्र मपने। सुइ आन कली जोल मपने। मुर नु दुशा बाक्कीन। याक्ब १:२६ ११ मरिम्शो पचा प्रोंइशा, ठीक गेय ला पने। १२ मारदे हना परमप्रभु यावेमी ठीक पाइब आन

कली कोव्रब। आन पुंडशो लोव्र नेंचा कली आ नोफा दाइक्ब। तन्न मरिम्शो पाइब आन कली मकोव्रब, आन पुंडशो लोव्र यो मनेंब” दे ब्रेक्शो बाक्ब।

भजन संग्रह ३४:१३-१७

येसु ख्रीस्त नेल्ल आन क्येडा ठेयब बाक्ब

१३गे ठीक गेय ला पाइतीनी हना, सुम इन कली श्येत गेबा डा? १४ठीक पशा यो मोशा श्येत जाइतीनी हना, आसीक ताइब दुम्नीनी। इन कली श्येत गेब कली महिनीन। इन थुंमी ग्येत्थ लुकच मदुमीन। १पत्रुस २:२०; मत्ती ५:१० १५तन्न इन थुंमी “ख्रीस्त ला प्रभु बाक्ब” दे मेको कली ठेयब सेलीन। गे गेना हना यो “इन थमा सुइक्तीके मार में” दे हिल्लो पाइब आन कली लोव्र लेत्वा ठीक दुम्शा बाक्कीन। ब्रेम्शो थुंमी रिम्शो लोव्र पा लोव्र लेत्तीने। १पत्रुस २:२१-१४ १६इन थुं डा मिम्तीक कली पाप रे डोन वोतीन। इन कली शुक्शी पाइबपुकी ख्रीस्त आ नेंमी रिम्शो पशो तशा, मुने दोक्मल। १पत्रुस ४:६ १७मरिम्शो पशा श्येत जचा क्येडा ठीक पशा, श्येत जचा परमप्रभु यावे आ दाक्शो बाक्ब। १८मारदे हना ख्रीस्त यो मुर नेल्ल आन पाप क्याम्चा कली साइक्चा पुंडसाक्ब। ठीक पाइबमी ठीक मपाइब आन श्येत जाप्तु। मो पशा इं कली परमप्रभु यावे आ बाक्तीक चाक्दीप्ब। मोपतीके साइक्चा पुंडसीशा यो, सेंचा पुंडसाक्ब। १९नोले मेको आ सोक्त लशा, जेल्खानमी बाक्शो सोक्त आन कली लोव्र पाप्तु। २०मेको सु बाक्तेक्म देंशा हना, साइ डोंइती नोआहमी ठेयब डोंगा सेलानु, परमप्रभु यावेमी रिम्ना रिम्न बाक्शो बाक्त। तन्न परमप्रभु यावे कली

काइ मटीब, नोआह आ पाला डा बेक्शो मुर बाक्तेक्म। ८ जना मुर चहिं नोआह आ सेल्शो डोंगामी बाक्शा, ब्वाक्कु रे ब्रोंइचा ताम्तेक्म। उत्पत्ती ७:७; २पत्रुस २:५ २१ब्वाक्कुमी खुम्शा गुंडतीके मेको नु गारचा डा बाक्ब। मेकोमी इन कली मुल प्रोंइब। इन रां चिक्चा ममाइ, तन्न इन थुं डा मिम्तीके रिम्शो दुम्ल, दे परमप्रभु यावे कली पुंडतीके बाक्ब। मेको नेल्ल येसु ख्रीस्त आ सेंसीशो रे जाक्ब। एफिसी ५:२६; हिब्रू १०:२२ २२मेको स्वर्ग लशा, परमप्रभु यावे आ ग्युरा गे बाक्ब। परमप्रभु यावे आ स्वर्ग डा गेय पाइबपुकी, अधिकार तशोपुकी नु सक्ति पाइश्शो नेल्लेमी मेको आ देशो टीनीम। एफिसी १:२०-२१

थमा सुइक्ब श्येत जचा माल्नीम

४ दोपा ख्रीस्त रागीम बाक्शा, श्येत जचा, मोपा गो नेल्ल श्येत जचा माल्नय, दे मिम्तीन। सु सु रागीमी श्येत जाइनीमी, मेको मरिम्शो पतीक कली प्रोंइने थुम्शो बाक्नीम। २मिनु गे रागीमी बाक्नी सम्म इन दला दाक्स मपथु, परमप्रभु यावे आ दाक्शो पने। ३डोंइती परमप्रभु यावे कली मतुइक्थु मारेइ मारेइ पाइतीनी, मुल मेको गाप्त। थमा मसुइक्बपुकीमी मार पाइनीम देंशा हना, महिंब दुम्शा आन दला दाक्स पाइनीम। दुक्शा बाक्नीम, शुश जशा तूशा बाक्नीम नु ग्रांग्रा दिचा डा मूर्ति पूजा पाइनीम। एफिसी २:२-३; तीतस ३:३ ४गे चहिं मुल मेको आन पशो खोदेंशो मपाइनीनी। मोपतीके मेकोपुकी छक लाक्नीम। मिनु इन पबंम शुक्शी पाइनीम। ५तन्न मेकोपुकीमी बेक्शो नु ब्रोंइशो मुर आन कली निसाफ पाइब आ डोंइती मेको आ पबंम लोव्र

पचा माल्नीम। २तिमोथी ४:१ ६मोपतीके बेक्शो मुर आन कली यो परमप्रभु यावे आ ग्येरपाइक्ब लोत्र शेंशो बाक्त। परमप्रभु यावे खोदेशो पा सोक्तीम ब्रोंडचा तामेक्ल, दे रागीमी बाक्मानु, निसाफ पचा पुंडसाक्म। १पत्रुस ३:१६

परमप्रभु आ पपाइश्शो गेय

७रागी नु रागीमी बाक्शो मारेइ मारेइ नुपचा चिक्शो बाक्तेक्म। मोपतीके इन गेय पचा डोंइती मिम्शा नु आंम रां कली अरेशा प्रार्थना पने। १कोरिन्थी १०:११; १यूहन्ना २:१८ ८नेल्ल क्येडा ठेयब मार बाक्ब देंशा हना, शुश दाक्मुचा बाक्ब। मारदे हना दाक्मुतीकेमी शुश पाप यो ग्याम्ब। हितोपदेस १०:१२; याकूब ५:२० ९मगाइक्थु बास गेमुने। १०परमप्रभु यावेमी इन कली गेय का का पपाइश्शो बाक्त। मोदेशो पा वारच पमुने। परमप्रभु यावेमी गेशो गेय रिम्शो पने। ११सुमी लोत्र पाइबा, मेकोमी परमप्रभु यावे आ खुइश्शो लोत्र पवल। सुमी गेय पाइबा, मेकोमी परमप्रभु यावे आ गेशो सक्तिमी पवल। मोपा नेल्लेमी येसु ख्रीस्त आ नेंमी परमप्रभु यावे कली ठेयब सेल्मेक्ल। मेको छेडछेडमी बाक्शा, गेना हना यो सक्ति पाइश्शो बाक्ब। आमेन। रोमी १२:७

थमा सुइक्ब आन श्येत

१२मिनु आं दाक्शो लोकबपुकी, इन कली थुं थाम्चा डा श्येत शुश दुम्त हना, महिनीन। मेको मारेइ ममाइ। इन थमा सुइक्तीके नाक्चा कली बाक्ब। १पत्रुस १:६-७ १३गे ख्रीस्त आ श्येत जशो खोदेशो पा श्येत जाइतीनी हना, ग्येरसीने। मारदे हना आ छेडछेड पा जाक्ची ना शुश

ग्येरनीनी। प्रेरित ५:४१; याकूब १:२; रोमी ८:१७ १४ख्रीस्त आ नेंमी श्येत जाइतीनी हना, आसीक ताइब दुम्नीनी। मारदे हना छेडछेड डा परमप्रभु यावे आ सोक्त गे नु बाक्ब। मती ५:११; एफिसी १:१३ १५गेपुकी मुर कली साइक्ब, खुइ पाइब, ग्रांरा दिचा डा गेय पाइब नु अरु आन कली ग्येत्थ लुक्य सेल्शा, सजाइ तपाइक्ब खोदेशो मदुमीन। १६तन्न गे थमा सुइक्ब दुम्शा, श्येत जाइतीनी हना, मुने मपने। येसु ख्रीस्त आ नेंमी परमप्रभु यावे कली ठेयब सेलीन। फिलिप्पी १:२० १७निसाफ पची ना दुम्चशो बाक्त। परमप्रभु यावे आ खिं डा मुर डोंइती निसाफ पचा पुंडसीनीम। मिनु गो डोंइती डा बाक्तय हना, ग्येरपाइक्ब लोत्र थमा मसुइक्ब आन कली दोदेंब दुम्बा? येरमीया २५:२६; इजीकीएल ६:६ १८मिनु ठीक पाइब मुरपुकी हेरा ब्रोंडचा मताइब दुम्तेक्म हना, थमा मसुइक्ब नु मरिम्शो पाइबपुकी दोदेशो दुम्नीमी? हितोपदेस ११:३१ १९मोपतीके परमप्रभु यावेमी सु कली श्येत जचा गेबा, मेकोपुकीमी ठीक गेय पशा, आंम थुं परमप्रभु यावे कली जिम्मा गेमेक्ल। परमप्रभु यावेमी आ मुर आन कली गेनायो मप्रोंइब। भजन संग्रह ३१:६

खाल्पा नु ठिटा आन कली अरेशो

५ गो इन खोदेशो खाल्पा नड। गो थमा सुइक्ब आन दातेमी बाक्शो शेंब खाल्पा इन कली अर्ती गेनुड। गो ख्रीस्त आ श्येत जशो तशो नड। मुल गो जाक्चशो छेडछेड डा मुर यो दुम्ती। २यूहन्ना :१; मती २६:३७,६६; रोमी ८:१७ २इन कली मार अर्ती गेनुड देंशा हना, गे परमप्रभु यावे आ योत्रशो मुर आन गोठला खोदेशो दुम्शा, मेको आन कली रिम्शो

पा कोव्रडीन। इन थुंमी “आं मदाक्वशो गेय बाक्वब” दे मिम्शा ममाइ, तन्न “गो मेको गेय दाक्नुड” दे ग्येरशा पने। “क्येट चेम्नुड” दे मिम्शा ममाइ, तन्न रिम्शो शेंतीके गेय शुश पने। *यूहन्ना २१:१६; प्रेरित २०:२८; १तिमोथी ३:२-७* ३ “गो परमप्रभु यावे आ योव्रशो मुर आन कली हुकुम पाइब दुम्ती” दे ममाइ, तन्न मेको दोदेंब दुम्चा माल्नीमी, इन पशो गेयमी कोंडदीन। *इजीकीएल ३४:२-४; २कोरिन्थी १:२४; तीतस २:७* ४ नेल्ल क्येडा ठेयब गोठला जाक्मेनु, गे गेना हना यो लीब परमप्रभु यावे आ छेडछेड डा सिरपेच ताइनीनी। *हिब्रू १३:२०; १कोरिन्थी ६:२५; २तिमोथी ४:८* ५ मिनु गे ठिटापुकी, शेंब खाल्पा आन देशो लोव्र टिने। गे नेल्ल ब्रेम्शो थुं पाइशो दुम्शा, गेय पमुने। मारदे हना परमप्रभु यावेमी ठेयब लेशो मुर आन कली मकोव्रब, ब्रेम्शो थुं पाइशो मुर आन कली ला शिशी पाइब। *एफिसी ५:२१; अय्युब २२:२६; हितोपदेस ३:३४; मती २३:१२; याकूब ४:६*

६ मोपतीके गेपुकीमी “नेल्ल सक्ति परमप्रभु यावे केन बाक्वब” दे आ देशो लोव्र ब्रेम्शो थुंमी ठीक पा टिने। मो पाइतीनी हना, परमप्रभु यावेमी आ मिम्ची ना इन कली ठेयब सेल्ब। *याकूब ४:६* ७ गेपुकीमी “मार जाइनीकी? मार तूनीकी? मार फेक्नीकी? मार दुम्नीकी?” दे हिंशा, सुर्ता पचा ममाल्नीनी। मारदे हना परमप्रभु यावेमी इन कली कोव्रब। *भजन संग्रह ५५:२१; मती ६:२५; फिलिप्पी ४:६* ८ गेय पचा डोंइती मिम्तीन। होस पा बाक्कीन। मारदे हना इन कली मदाक्वब सैतानमी

शोव्रलु बेक्वशो गुप्स खोदेशो पा “सु कली ब्वाइनुडा” दे माल्ना माल्न गाक्वब। *१थिस्मलोनिकी ५:६; लूका २२:३१; २कोरिन्थी २:११* ९ गेपुकीमी थमा सुइशशा “गो सैतान कली तुइक्नुड” दे मेको कली काइ मटिने। रागी नेल्ल डा थमा सुइक्व लोक्वपुकीम मोदेशो श्येत जाइनीम दे तुइक्नीनी।

पत्रुस आ गेशो आसीक

१० मिनु का निक्शी नाक्त श्येत जनी नोले नेल्ल शिशी पाइब परमप्रभु यावेमी “गेना हना यो छेडछेडमी बाक्वा गेनुडमी” दे ख्रीस्त आ नेमी इन कली ब्रेशो बाक्वत। मेकोमी इन कली आ राज्यम गारचा डा सक्ति पाइशो नु ठीक सेल्ब। *१पत्रुस १:६* ११ मेको गेना हना यो नेल्ल क्येडा ठेयब बाक्वब। आमेन।

नोले डा लोव्र

१२ गो सिल्वानस थमा सुइक्व लोक्वब बाक्वब, दे मिम्शा, आं ब्रेक्वशो आइक्व चिठी मेको नु सोइक्ताक्वड। गो इन कली परमप्रभु यावे आ थमा शिशी मार बाक्मे, मेको शेंताक्नी। मिनु गे मेको तुइशशा, थमा सुइक्वा मप्रोंइथु बाक्कीन। *प्रेरित १५:२२* १३ इन खोदेशो बेबीलोनम बाक्वशो योव्रशोपुकीमी यो इन कली “रिम्शो बाक्कीन” दे आं कली ब्रेक्वाइक्तीमी। मिनु आं तौ मर्कूसमी यो मो देंत। *२तिमोथी ४:११* १४ गे दाक्मुशा, प्रभु आ नेमी मुमुने। परमप्रभु यावेमी ख्रीस्तम बाक्वशो नेल्ल इन कली थुं नाइक्वा गेवल।